

# DA-E SALANA

## Ammentos de fèminas sedilesas

de Sarbadoranzelu Manca



Su Tusorzu. (Foto famiglia Manca)

Sa festa manna de sos pastores, custu fut su tusorzu!

In su mese de maju, innanti de che sicare sos fenos e chi s'istiu esseret comintzau a fagher suffrire meda sas erbeghes, su pastore arrodiat sos ferros de tùndere, detzidiat sa die cun sos cumpanzos, ca fun dies chi cherian torradas e aparitziat sa festa.

Su tusorzu sinniat sa fine de s'annada, ca cun su siccare de sos fenos su latte minimia finas a mancare de su totu. Ma annada bona o mala ch'esseret, sa festa si faghiat, nessi po s'augurare chi sa chi inriat esseret menzus. Su sero innanti si no su manzanu etotu, a sa friscura,

su pastore 'ochiat sos pegos chi bi faian bisonzu po fagher sa festa.

E a su manzaneddu pò ismurzare si che papian, sa corda, su ortau, unu cantu 'e casu, pagas tassas de 'inu e fun prontos a s'impreu de sa die. Su pastore tenia prantu su logu, si bi-nd'aiat, in s'umbra de carchi mata o mola, aiat tatu sa mandra e innetiau su logu.

Unu rugu de omnes comintzaiat a trobeire sos pegos e a che ddos accortziare a sos tundidores chi a chie apipirinau, a chie incrubau o imbrenugau illiberian sa erbeghe da-e s'istimentu de s'ieru.



(Foto famiglia Mameli)

Si tundiati chentza frimare, po no ch'abarrare a s'ora de su caentu meda, ma semper nande e contande de ite fut bistada s'annada, o ateros contos de sa vida de su pastoriu, fortzis semper sos matessi, a bortas frorizaos a bortas ingraios da-e su andare de su tempus. Gasi che coliat su manzanu; una orta agabau e regorta sa lana (sa niedda e s'anzonina a parte) si papiat sa petza a buddu e arrustia bene accumulanzada da-e unu bellu tzicu de 'inu nieddu, chi allerghiat su coro e pò serrare sa festa, massimamente sos zovanos s'isfidian a gherrare a chintzu o a tzetzer caddos a sa nua, o a sa murra.

Ma cale fut sa resa de sa lana?

Sa lana sarda no est mai balia meda pò su mercäu de fora, fut troppu brutta e russa e b'aiat troppu perdimentu,<sup>1</sup> ma teniat unu impitu mannu meda in sos trastes de 'orno.

Po dda podere impitare, sa lana cheriat sammunada bene, bi cheriat abba meda, tando si caliat a Frumene

Mannu, a sos palaos de Sos Corros in sos tretos de Pedra Lada, calande da-e Tzicori e santu Leori o a su Paiau de Mandras, in Biddinchis calande de santu Antinu. Si partiat chitzo cun su carru carrigau da-e sa lana, sas labias e totu su chi podiat serbire, appena arribaos si faghian sos fogos e si accaddian sos istrezos cun s'abba in sos tribidanzos.

Sa lana anzonina si ettiat cando non resistiat prus manu, sa madrighina a su primu bullu, cando si-che 'oghiat s'illurtzia in s'abba currente de frumene aintro de sas pisheddas, a pustis s'isterriat in sa code caente pò assutare; cando che fut assutada si-che torriat a intro de sos saccos.

Custu traballu che leiad' tottu sa die, fintzas ca a bortas si faiat unu cumandu e duos servitzios e si faiat sa lissia e s'impedrigaiat su linu.<sup>2</sup>

Una orta samunada sa lana niedda si laminiat e si petteniat cun sos pettenes de ferru pò che 'ogare s'ena, chi fut sa prus fine e prus longa e serviat po faghene s'istamene. Da-e custa lana pettenada si tessiat su furesi, chi serviat pò faghene capotinas, cabanos e cabaneddas. A pustis tessia custa tela si mandiat a sas craccheras de Santulussurzu pò dda catzigare; colian de carrela in carrela cun sos caddos, sos lussurzesos, abboghinande «E



(Foto famiglia Mameli)

chie at furesi 'e catzigare!». limanti de ddu sostare e ddu cosire beniat tintu.<sup>3</sup> Cun sa lana russa chi abarriat (culu e pettene) si tessian faunas de batter impostas, saccos de arzola, pantalones de murghere e bertulas.

Sa lana bianca non cheriat pettenada si no serviat po faghene lentzolos de furesi, mancu laminada si s'impitiat pò banittas e cabidales; si no si laminiat e filiat eretta, cun fusu e crannuga. A segundu de su colore chi si cheriat faghene si impitian varias erbas, fruttos o matas. Po sa russarla de sa trama si trofiziat cun su fusu a duos o tres cabos de lana. Po dda tinghere si faiat a bangazos cun su sorbidorzu a rughe o de manu.

Innanti 'e tessere cheriat ordiù s'istamene a segundu de cantu si cheriat longu e largu su tessinzu.

Po faere s'ordinzu si ponian chimbe roccos in terra, battor a quadrau e unu a tesu (a segundu de sa longaria de s'istamene) chi resurtiat in mesu, a una punta e a s'atera si tztzian duas feminas, sas ateras zughian sos lomberos<sup>4</sup> de sa lana da-e unu roccu a s'ateru, chi cando bis aporrian su filu ddu tirian pò no b'arreare filus lentos o noos.

Totu a inghiriu a sas feminas chi fun ordinde, in sa carrela, sos pitzinnos zoghian prontos a currere, cando che finiat su lomberu ischinde ca in mesu b'aiat semper' carchi cosa, una mendula, una nutzola, una cufettura, una caramella.

Una orta fatu s'ordinzu, a segundu de su disinnu chi si cheriat zare a su tessinzu e a s'impittu chi si-nde faiat, tapettos, bertulas, faunas, s'istamene si faiat colare in sos litzos e

in su pettene; si accaddiat su petzu in su telarzu e s'ispola comintziat a currere de un'ala a s'atera faghinde operas chi an sinnau su tempus.

È oe? Sa lana sarda est prus pagu appretziada de tando, fintzas pò tessere dda comporamos da-e fora. Est prus modde, prus a filu longu, b'at prus pagu perdimentu, medas trastes no sun prus de impitu fitianu, a ddu narrere in pagas paraulas no cumbenit; ma, fintzas sa petza, su inu o s'ozu s'agatan prus a barattu, a bortas sun fintzas bonas, e tando?

Tando est ca pò muntenner su mundu bellu coment'est toccai a nde muntennere sas differentzias sia de sabores che de colores, e fortzis in cust'idea fintzas sa lana sarda at a agattare su logu su.<sup>5</sup>

#### NOTE

- 1 In su 1949 su prodottu de totu sa Sardinna fut de 2.132.870 chilos. Sigomente bona parte 'eniat bendia pò prenere banittas, solu 277.200 chilos si podian impitare (dal "Compendio statistico della regione sarda 1950-51").
- 2 Una orta cumpriu su semene, su linu ch'eniati bogau e pistau pò che tirare sa semenanzia pò s'annu a pustis. Fattu a fasches mannas beniat postu a modde in frumene e impedngau e lassau una bindigada; cando si che oghiat s'illurtziat e si poniat a mannurgheddos ritzos pò assutare. Una orta torrau a domo eniat argadau.
- 3 Po tinghere su furesi si faiat sa mina: si pistiat corzola de crecu e lurettas e si poniat a modde m'abba caente, essiat in colore de tabaccu. Sa segunda tintura si faghiat cun su triuscu chi bi jaiada su colore nieddu.
- 4 Sos lomberos si faghian isboligande sos bangazos da-e su sorbidorzu mannu.
- 5 Cust'arliculu est'istau iscrittu grazias a sos amentos de Maria Mameli (82 annos), Pedrutza Melone (76 annos) e Titina Pilitta (71 annos).



**ALLEANZA**  
**ASSICURAZIONI**

Assicurazioni Vita - Unit Linked  
Fondi pensione - Investimenti

Piazza Eleonora - Tel. 0783.70270 - ORISTANO  
Ispettorato Ghilarza - Tel. 0785.52408